

tionibus dotarunt, & e cujus cineribus pulchræ *Harringtoniorum* ædes hoc in loco surrexerunt. In Ortum tendenti statim se *Cester-Over*, Grevilliorum, de quo ante obiter egi, juxta quam via militaris Romanorum *Vatlingstreet*, in Septentriones hunc Comitatum à Leicestrensi interdicens procurrit per *Highcrosse*, de qua jam diximus, prope *Nann-Eaton*, quæ olim *Eaton* dicebatur, sed cum Amicia Roberti *Bosfi* Leicestrensis Comitis uxor, ut scribit Henricus Knighton, *Sanctimonialium monasterium fundasset, in quo ipsa facta Sanctimonialis*, à Sanctimonialibus *Nonn-Eaton* appellari cepit. Magnaque erat superioribus seculis celebritate ob sanctimoniam sacrarum virginum, quæ ibi precibus assiduæ, bene vivendi exemplum præbuerunt.

Asteley.
Baro *Asteley*.

Sub hoc *Asteley* Castrum quondam floruit, familiae de *Asteley* sedes primaria, cujus tandem hæres fuit data in uxorem secundam Reginaldo Grey Domino de *Ruthin*, è qua prognati sunt Grey Dorsettiæ Marchiones, quorum nonnulli in nitidissimo Collegio hic inhumati fuerunt.

Manduesedum.

Mancester.

Paulo supra ad *Vatlingstreet*, sic militarem Romanorum viam cum vulgo vocamus, ubi ponte saxeo *Anker* fluvius conjungitur, *MANDVESSEDUM* oppidum longe vetustissimum ab Antonio memoratum locum habuit, quod suo nomine non omnino viduatum, nunc *Mancester* dicitur, Ninnii Catalogo *Caer Mancegued*. Quod nomen, cum lapidicina adjaceat, è qua structiles lapides effodiuntur, à lapidibus effosis, & excisis impositum suspicari liceat. E Britannicæ enim linguæ Glossariis *Main* lapidis & *Fossad* provinciali lingua effodiendi significationem habere docemur, quæ conjuncta antiquum illud nomen *MANDVESSEDUM* satis expresse referre videatur. Quantum autem & quaecunque olim fuerit, viculus hodie perexiguus vix quatuordecim ædículas numerat, & nihil antiquum præter molem antiquam ostendit, quam *Oldbury*, id est, *antiquus Burgus*, dicunt. Hinc enim *Atherstone* mercatus frequens, ubi fraterculorum ædes in Capellam conversæ, quæ tamen Ecclesiam de *Mancester*, ut matrem agnoscit, illinc *Nonn-Eaton* sua vicinitate exhausterunt. *Atherstone* contiguum *Merivall*, id est, *vallis hilaris*, ubi Deo & Beatæ Virgini Monasterium erexit Robertus de *Ferrariis*, in quo ipse corio bubalino inteclus sepultura traditus. Ultra hæc ad Boream est *Pollesworth*, ubi sacris virginibus *Modwena* virgo Hibernica insigni sanctitatis opinione cœnobium construxit quod R. *Marmion* vir nobilis instauravit, qui suum habuit castrum in vicinia ad *Stipperf-hull*. Juxta etiam Saxonico seculo floruit, quod nunc fere evanuit, *SECANDVNVM* hodie *Seckington*, ubi *Æthelbaldus* Merciorum Rex intestino bello anno Salutis *DCCXLIX*, à Bearedo transfossus occubuit; & mox Bearedus ab Offa peremptus, eo scelere quo regnum invasit subito amisit.

Merivall.

Pollesworth.

Seckington.

Comites
Warwici.

Warwicenses Comites jam sunt recensendi, ut enim omitam Guarum, Morindum, Guidonem Angliæ tympanum, & ejus notæ alios, quos fecunda ingenia uno partu nobis enixa sunt, Henricus Rogeri de *Bello-monte* filius, Roberti Comitis *Mellenty* frater, primus fuit è Normannico ge-

nere Comes, qui Margaretam filiam *Ærnulfi* de *Hesdin* Comitis *Perticensis* potentissimi viri sibi in uxorem junxerat. Ex hac familia hunc honorem gesserunt Rogerus filius Henrici, Guilielmus filius Rogeri, qui obiit tricesimo Regis Henrici Secundi; Walleranus frater ejus, Henricus filius Wallerani, Thomas filius ejus, qui vicesimo sexto Regis Henrici III mortuus sine sobole, Margeria sorore superstite, quæ Warwici Comitissa obiit sterilis, cujus tamen duo mariti, primum Ioannes Marecallus, deinde Ioannes de *Placetis* uxorio ju-re, & principis gratia in Comitum Warwicensium honorem ascenderunt. His autem sine prole ex illa Margeria defunctis, Wallerandus Margeria patruus surrogatus est. Illo sine sobole mortuo soror ejus Alicia hæreditatem adiit. Postea Guilielmus ejus filius, *Maledoctus*, *Malduit*, & *Manduit* dictus de *Hanslap*, qui sine liberis è vita decessit. Isabella autem Guilielmi *Male-docti* soror Guilielmo de *Bello-campo*, sive *Beauchamp* Baroni de *Elmesley* collocata Warwicensem titulum in *Beauchamporum* familiam intulit. Qui (si me non fallo) quod ex *Vrfsi d' Abtor* filia fuerunt prognati, *Vrsum* pro Symbolo usurparunt, & posteris reliquerunt. Ex hac stirpe sex floruerunt Comites, & Dux unus, Guilielmus Isbellæ filius, Ioannes Guido, Thomas, Thomas junior, Richardus, & Henricus, cui novo exemplo concessit Rex Henricus Sextus ut primus & præcipuus esset Angliæ Comes, & hoc titulo uteretur, *Henricus Præcomes totius Angliæ*, & Comes *Warwici*, Vectæ insulæ Regulum dixit, posteaque in Ducem Warwici creavit, & expressis Diplomatis verbis concessit, ut haberet sedem in *Parlamentis* & alibi proximam *Duci Norfolkiciæ*, & ante *Ducem Bucchinghamiæ*. Huic nata est unica filia Anna, quæ in *Inquisitionibus Warwici Comitissa* dicitur, & teneris annis obiit. Successoremque habuit Richardum *Nevill* (qui sororem Ducis illius Warwici duxerat) virum invicto animo sed fluitante fide, fortunæ quodammodo pilam. Qui non Rex Regibus fuit superior, utique qui Henricum Sextum benignissimum sibi Principem regno spoliavit, Edwardum Quartum in folio regio collocavit, deinde deturbavit, Henricum Sextum ad arbitria rerum denuo revocavit, Angliamque luctuosissimo civilis belli incendio involvit, quod ipse suo sanguine tandem vix restinxit. Edwardus hujus è filia altera, & Georgio Duce Clarentiæ nepos successit, quem puerulum & infontem, in suam & suorum securitatem, capiteplexit Henricus Septimus. Iacuit deinde ille titulus qui Henrico Octavo formidolosus fuit ob turbas quas Richardus ille *Nevill* regum flagellum dederat; donec Edwardus Sextus Ioanni Dudleyo genus à *Beauchampis* repetenti detulerit, qui (ut jam dictus Richardus) vertere sceptrum molitus sub Maria Regina profundam ambitionem capite luit. Filii autem ejus primum Ioannes cum jam pater esset Dux Northumbriæ, recepta consuetudine hoc titulo paulisper est usus: & postea Ambrosius bellica virtute, & naturæ facilitate ornatissimus Regiæ Elizabethæ benignitate illam patris dignitatem nostra memoria recepit, cum magna laude gessit, & sine liberis diem obiit.

In hoc Comitatu sunt Ecclesiæ Parochiales 158.

Placita
E. 3.
Rotulo
234.

Rot. Parl.
23. H. 6.
24. H. 6.

W.O.R.